

ENIGMES
SVR LE
TE DEVM
QVON A CHANTE
POVR LA PAIX.

M. D C. XLIX.

1220

ENIGMES

3V R L E

THE DEVM

OVON A CHANT

OV R A PAIX

H C C X L I I



ENIGMES

SVR LE TE DEVM Q'ON A
chanté pour la Paix.

Te Deum laudamus.

GRAND Dieu nous vous louons de ce qu'il vous a
pleu nous donner la paix.

Te Dominum confitemur.

Nous confessons que vous estes le Seigneur des Seigneurs, puis que vous vous estes rendu Maistre des volontez de tant de Seigneurs qui ne respiroient que nôtre ruine.

Te aeternum Patrem, &c.

Mais nous vous reuerons comme nostre bon Pere, puis que vous nous avez preseruez de tant de malheurs.

Tibi omnes Angeli.

Tous les Anges qui reçoient vos ordres, & qui sont les fideses executeurs de vos commandemens.

Tibi Cæli.

Les Cieux qui roulent sous vous.

Et vniuersa potestates.

Et toutes les puissances qui dependent de vostre diuine Majesté.

Incessabili voce proclamant.

Ne cessent point d'entonner vos louanges, & de publier par tout.

Sanctus.

Que vous estes le Sainct des Sainctes qui sont autour de vous, & non pas de ceux qui sont sur terre veu que le nombre en est si petit, & qu'on n'y voit plus que trahisons.

Dominus.

Que vous estes le vray Seigneur, & que tous les autres

4

qui sont sur terre vsent mal du pouuoir que vous leur auez
donné.

Deus sabaoth.

Que vous estes le Dieu du sabath, mais non pas le Dieu
du sabath ou tant de personnes deuiennent maintenant si
sacrileges, & mesmes la plus haute condition.

Pleni sunt, &c.

Le Ciel & la terre sont pleins de la Majesté de vostre
gloire, mais peu de personnes le reconnoissent & personne
ne respire apres vos grandeurs, mais seulement apres des
grandeurs passageres, & sur tout les grands Seigneurs de
ce temps icy.

Te gloriosus, &c.

Le glorieux cœur des Apostres qui vous loue fait voir,
que s'il ne se trouua qu'un traistre en vostre compagnie il
deuoit estre de France, veu qu'elle en est maintenant toute
pleine.

Te Prophetarum, &c.

Le loüable nombre des Prophetes qui vous ont deuané
fait voir que peu vous ont suivis, & qu'on ne voit plus que
des balaams sur terre qui veulent s'excommunier pour de
l'argent.

Te Martyrum, &c.

Mais si tant de Candides Martyrs vous loüent dans le
Ciel tant d'autres que la pauvreté fait sur terre implorent
vostre assistance, & vous prient de lancer vostre tonnerre
sur ceux qui sont causes de leurs malheurs.

Te per orbem, &c.

Toute vostre fidelle Eglise confesse dans toute la terre
que vous estes le Pere d'une grande Majesté, mais que dis-
je vostre Eglise, il semble que vous n'en ayez plus, & que
vostre pauvre Espouse deuiet tellement dispersée qu'il
semble qu'elle n'aye plus d'enfans puis qu'ils sont si par-
tagés, & que tous les iours ils s'alambiquent l'esprit dans
de nouvelles doctrines & de ridicules erreurs.

Venerandum, &c.

Ouy vous n'avez qu'un fils vnique & veritable, & quoy
que toutes les creatures qui sont sur terre ayent receu lettre
de vostre main, elles ne vous reconnoissent plus pour leur
Pere

Pere & elles fuyent de vos bontez, avec vn mespris visible de vostre foudre. *Sanctum quoque, &c.*

Mais que les inspirations de vostre saint Esprit sont peu écoutées, puis qu'au lieu qu'il ne porte aux oreilles & au cœur que la clemence & la douceur, on ne respire que la vengeance & que la haine. *Tu Rex, &c.*

Vous estes, ô Iesus-Christ Roy de gloire, mais seulement de la gloire du Ciel, puis que vous estes ennemy de la vanité & du Luxe qui regnent sur terre.

Tu Patris, &c.

Vous estes le Fils eternel de ce Pere eternel, & peu reconnoissent vostre eternité quand ils ne reconnoissent pas vostre gloire. *Tu ad liberandum, &c.*

Que pour racheter ces miserables qui ne reconnoissent pas vos faueurs, il estoit necessaire que vous choisissiez au temps que vous estes né vne Vierge pure comme vostre bien-heureuse Mere, puis qu'en ce temps icy il se trouue peu de Vierge volontaires & toutes forcées & imparfaites.

Tu deuicto, &c.

Et si en vainquant la mort vous auez ouuert les cieux à ceux qui éclaireront des lumieres de la foy croient en vos miracles, & que peu de personnes courent apres ces lumieres & se plaisent dans les tenebres & dans l'honneur de leurs pechez. *Tu ad dextram, &c.*

Vous estes assis à la dextre de vostre Pere, & vous voyez d'enhaut comme ceux que vous auez rachetez se vendent les vns aux autres. *Index cæderis, &c.*

Ah ! que si tout le monde se ressoüenoit bien de cette verité, que tant de petits iuges qui sont establis sur terre yseroient mieux de leurs charges, & ne se laisseroient pas corrompre aux prieres & à l'argent, & que les personnes qui se disent auoir quelque pouuoir sur les autres, apprehenderoient bien vos Sacrez & inuiolables iugemens.

Te ergo, &c.

Mais pourtant, mon Dieu, le peu de fideles qui restent

sur terre recourent à vostre aide, & supplient vostre diuine Majesté que comme vous les auez rachaptée de vostre precieux Sang vous vouliez les deliurer de tant de petits tirans qui ne demandent que la ruine de toute la France.

Aeterna fac, &c.

Faites leur la grace qu'apres auoir longuement exercé leur patience sur terre par vostre permission, ils iouyssent vn iour avec vos bien-heureux d'une gloire eternelle dont ils voyent la terre si éloignée.

Saluum fac, &c.

Sauuez vostre peuple Seigneur, & des ennemis qu'il a en ce monde, & de ceux qu'il aura en l'autre: ce sont vos heritiers, & de vos traueux, & de vostre Croix qu'ils le soyent de vostre gloire.

Et rege eos, &c.

Gouuernés-les Seigneur gouuernés-les, puis qu'ils ne se trouue maintenant personne sur terre capable de les gouuerner, & que tous ne demandent qu'à s'engraisser de leur sang & de leurs dépouilles.

Per singulos, &c.

Nous vous loions & vous benissons tous les iours comme Maistre souuerain du Ciel & de la terre, & comme attendans de vostre bonté ce que nous ne pouuons attendre des hommes.

Dignare Domine, &c.

Daignez ô Seigneur, daignez nous faire la grace que nous ne commettons aucuns pechez, puis que dans le temps ou nous sommes, nous ne scaurions nous empescher de médire, de pleurer & de nous plaindre, veu tant de fourberies que nous voyons qui s'exercent, tant de meschancetés qui se trament, & tant de voleries qui se commettent tousiours, & qu'elle apparence de nous taire & de voir tant de tirans abuser de l'autorité du Roy & regner impunement, qu'elle apparence de nous taire & de voir toute la France ruinée; mais mon Dieu, donnés nous la vertu de patience, puis que c'est le plus seur remede à nos maux, &

que nous ne voyons point de fin à nos miseres.

Miserere, &c.

Ayez pitié de nous Seigneur ayez pitié, puis que c'est vous seul qui devez terminer nos maux, & dont nous devons adorer l'Empire. *Fiat, &c.*

Que ce mesme mot par lequel tout le monde a esté fait soit employé pour nous donner du repos, puis que c'est en vous seul que nous esperons comme en nostre Pere & en nostre Protecteur. *In te Domine, &c.*

Et moy particulièrement Seigneur, j'espere en vos bontés & en vostre misericorde, esperant de ne recevoir iamais la Confession que mes pechez meritent.

Amen.

Ainsi soit-il mon Dieu, ainsi soit-il, que nous soyons deliurés de nos ennemis, & que nous iouyssions de nostre gloire.

E I N.

